

# محاولة أخيرة للاحتراق

الشاعر /

شريف شعبان خميس



الطبعة الاولى

يناير ١٩٩٨



إهداء

إلى الأستاذ الأديب

هاشم عبد الواد

مع طاعة الأستاذ



٩٨١٦١٢١

رقم الإيداع لدى دائرة المكتبة الوطنية

( ١٩٩٧ / ١٠ / ١٥٧٢ )

رقم التصنيف : ٨١١

المؤلف ومن هو في حكمه : شريف شعبان خميس

عنوان الكتاب : محاولة اخيرة للإحتراق

الموضوع الرئيسي ك ١- الآداب

٢- الشعر العربي

بيانات الشاعر :

\* تم إعداد بيانات الفهرسة والتصنيف الأولية من قبل دائرة  
المكتبة الوطنية

بسم الله الرحمن الرحيم

تقديم

## وجع الكتابة أم كتابة الوجع شاعرية الروح أم روحانية الشعر

بقلم الأديب الناقد / فوزي الخطبا

إن الشعر هو مرحلة خلق لتحويل العدم الى وجود والشاعر / شريف يحلق دائماً في فضاءات الابداع يسكنه الوجع والمعاناة وتورقه إنفعالاته مسكون بقلق المبدع الخلاق ليعلن محاولته الاخيرة للإحتراق. فهي مخاض الروح المتعبة وإبنة قلق مشروع ونتاج تجربة عنيفة هي بمثابة هزة وجدانية هائلة ستظل محلقة في فضاءات الإبداع باحثة عن المطلق في كل شيء إبتداء بالوجود وأنتهاء بالعاطفة لأن عطاء الارض الى فناء إلا عطاء الموهبة فهو الأبقى والأنفس والأرواح لأننا نستمد من واحتها الدفء ومن مكنوناتها الامان والإطمئنان ولا سيما اذا كان المبدع مسكوناً بصدق التجربة ووهجها رؤية وتشكيلاً ومن هذه الأصوات المتميزة صوت الشاعر / شريف شعبان خميس الذي ظهر في فضاء التسعينات وتلك المرحلة الأشد تعقيداً وتشابكاً. التي تمخض عنها ظهور أصوات شعرية ضخمت دماً جديداً في جسد الشعر وهزت فينا الوعي

الخلاق وفتحت لنا آفاقاً ممتدة من الرؤى الابداعية الخلاقة.  
وشريف من الاصوات الشعرية التي تمتلك نبض إيقاع القصيدة العامة  
الحديثة بكل تحولاتها فجاء صوته مسكوناً بهذا النبض المتدفق وإنه إمتلك  
ابعاد الرؤية الفنية العالية المستوى فقاموسه الشعري غني بمفرداته العاطفية  
التي تحمل بصماته الذاتية وخصوصيته الشديدة معتمداً على الصدمة  
الابداعية التي يوجهها الى القارئ او المتلقي دون تكلف او مبالغة.  
مؤكداً أن العاطفة وحدها لا تخلق عملاً فنياً متميزاً ولكن الفن يجسد  
عاطفة قوية وخاصة اذا كانت نابضة بصدق فهو يقول بصوت العاشق  
الصامت الذي يشبه الشمعة التي تمنحنا الضوء والدفء رغم احتراقها  
ووقوفها على خط الثلاثي في هامش قصيدته «السقوط من شرفة المدى»

لو مرة مات فيه الكلام  
أو كان لسانني من خشب  
حتكوني كلمة ما تنقراش  
ومعنى عمره ما ينكتب  
من نور جـــــــــــــــــينك  
تستعير نورها الشهب  
من طهـــــــــر قلبك  
كل البنات راح تغتسل



كما نلاحظ انه يربط بدقة واقتدار بين الذات والأنا . الذات الداخلية والخارجية ليبرز هذه العلاقة الترابطية والضدية في أن واحد ويتجلى ذلك في قصيدته « لافتات على قارعة الصمت » فهو يعيد خلق الأشياء الماضية برؤيته الخاصة . لنلاحظ المقطع الرابع منها حيث يقول :

الفرق ما بين اصل وجودك

وما بين ضلك ع الحـيـط

إن انتـه عـبـيـط

ضلك بيـخـش ف أبـعـادك

ويتـابـع دايماً تـكوـينك

لكن انتـه بـتـهـرب من ضلك

مع انه سـاعـات يتـدارى فيك

ولتتابع المقطع الخامس حيث يقول :

مكسـورة مـلـامـحك

ف مـرـايـتك

مع إنك بتـشـوف فيـها

كل الكون إلا انتـه

لقطات سريعة متتالية ترسخ في ذهن المتلقى او القارئ مدى عمق الرؤية

اذا تراوحت مع البعد الفلسفي لتخلق لوحات فنية بحاجة الى وقفة تأمل  
طويلة قبل الدخول اليها كما ان الميثولوجيا هي من ابرز مكونات القصيدة  
عند شريف ويتكأ عليها في حالة التوق والبوح عن المواجه وهذا الإنكاء  
بعيد كل البعد عن الجاهزية والمعلوماتية ونلاحظ ذلك عندما يقول :

إفتحيلي باب مشاعرك

لجل ادخل مرة واحدة

في عوالم وحدنيـتك

وابني يا هامــــان

سلم الرصد الكبير

لجل اصعد لسمائك

عند موسى. ورب موسى

وأقرأ مراسيم إعرافي بين إيديكي

لجل اكون رب المشاعر

أصلي شاعر إن من غيرك

مضيش في الكون مشاعر

يتجلي البعد الفلسفي في قصائده العميقة والمكثفة . التي يعتمد في بنيتها  
على الصورة الشعرية التي تستمد مكوناتها من ذهنه المتفتح وثقافته  
العميقة . المتنوعة فالاستلهامات الروحية والغيبية تؤسس في ذهن الشاعر

تجربة مكتملة . آفاقها ممتدة ومفرداتها متسعة دون ان يقع في الرتابة والتكرار ويتضح لنا ذلك في المقطع الرابع من قصيدة « محاولة أخيرة للإحتراق » عندما يقول :

أنا إيه وليــه  
أنا كنت جــــــــــــــــرف زــــــــــــــــمان  
بيتوضا بأوجاع المعاني  
لجل يكون قــديس  
في دير الكلمــة  
راهــــــــــــــــب ع الــورق  
ولما أمرته انه يسجد للألم  
مليون رفض وسجدت أنا

وكذلك حينما يتابع هذه التداخلات الفلسفية المتشابكة فيقول :

عــفــور عــبيط  
شده الغنا لحظة دمــوع  
من خلف زنزانــته  
اللي كــانت من ذهب  
عصرت قلبي بحسرتي

وفتحت له باب القفص

بصق في وشي

وإنزوى في الركن

وبكىنا ســــــــــــــــوا

والبعد المبتاز يقي عند الشاعر ينساب من القصائد متدفقاً ليمنح القصيدة  
ملايح وسمات إبداعية ونلاحظ المقطع الخامس من قصيدته « أغنيات ما  
قبل الوداع الأخير » حيث يقول :

ســــــــــــــــامحيني

لو مرة لبت السما

وطبقته . ومضغتها

وخببته لحظة خوف

في جــــــــــــــــيبك

وربطت ليلك المشاكس

في جذوع بأس الأماني

مع شهقة البوح الأخيرة

ونلاحظ في قصائد شريف تمازج موفق بين الشكل والمضمون لأن المبدع  
الحقيقي هو الذي يبتكر في الشكل ويكثف في المضمون فالنشاط  
الإبداعي ذو طبيعة قيمية معمارية وإذا نظرنا إلى قصيدته « لقطات سريعة

« والتي يعتمد فيها على تسليط الضوء على الحدث ومن ثم إضاءته فرغم تعدد المقاطع وتنوعها إلا إنه يربطها خيط شعوري واحد وهذه هي قصيدة الدهشة قلباً وقالباً.

كما انه يوظف الدين بإقتدار وتتضح قدرته الابداعية على مزج الآيات القرآنية وصهرها داخل نصه الشعري وكثافة تلاحقها وجعل معاني الآيات الكريمة داخل النص تأخذ أبعادها الكافية في الدلالات والرموز حينما يقول :

أنا كل ما أفــــرأ  
اشــــعاري عليكـي  
بحس إنـي بقــــيت نبي  
وانك رســــالتي للوجود  
وعينـيكي أكبر معجزة

وكذلك حينما يقول :

من قبل ما رب الخلق  
ينفخ الصــــور  
ويصــــب الــــروح  
في قــــرايز التكوين الاول

ويشكـل م المادـة فـراغ  
لوجود العدم المزروع فـينا  
لجل ما يستوي ع العرش  
أنا كنت الست أيام  
الداخلـة ف أصل الاشـياء

ونلاحظ هنا الأثر القرآني وأثر الثقافة الدينية على كتاباته والربط الرائع بين الموروث الديني والعاطفة والتألف المتمتع بينهم بكل عفوية وصدق.  
إن صورة المرأة في شعر شريف هي ملامح دنيا المدرسة الرومانسية فيها والانفة والكبرياء والمكابرة والعاطفة الصادقة والرؤى الحاملة الوردية والشفافة وهذا السمو العاطفي والبعد الأخلاقي الذي آلفه الرومانسيون في قصائدهم. ويتجلي ذلك في قصيدته « أغنيات ما قبل الوداع الأخير » حيث يقول :

إسألـي عـن الشـوارع  
اللي خـبـبت جـوه أنات أرصفتها  
آخر ملامح فجر شفقشـق من عبونك  
كـبرياء اللـحظة لما تغسل اللـيل  
المـنـط جـوه مـني  
دمع الخطاوي المـجـروحـين

واعتصار كل السنين

نبض طيفك لما يسري في عروقي

... الى آخر المقطع

وقصائد شريف في مجملها تقوم على لقطات شاعرية هائلة ومكثفة يحسن التقاطها وتوظيفها واستثمارها حتى تشعر ان أدغال القصيدة لديه بنبت على جوانبها أزهاراً جميلة لا يستطيل إليها العشب الزائد ويسمح لها بالنور والهواء لتتألق مما يجعل عملية النمو في بناء القصيدة مكتملة ومتناسكة . وقصيدته الطويلة تقوم على ذات النفس الدرامي وتدور حول محور شديد التماسك والترابط مما يجعل المعمار الفني والبنية التركيبية لديه مدهشة وعلى الرغم ان لغته مشدودة في بعض القصائد إلا ان العاطفة لم تخفق. كما ان قصائده كلها متصلة منذ البدايات حتى النهايات وهذا ما يدعونا بأن نصفها بأنها جملة شعرية واحدة كما انك تستطيع ان تصنع لها خطاً عمودياً تنمو في دورتها وتوغلها لكن لا تصل الى درجة الإقفال او الانغلاق.

وتتموضع في شعر شريف أبعاد متعددة منها البعد الميتافيزيقي والبحث عن المطلق في العاطفة والتمرد على كل شيء والبنية التناقضية في النص والضدية الرائعة. هذا هو ديوان « محاولة أخيرة للإحترق » وهو دعوة

مفتوحة من الشاعر لكم للتوهج والإندهاش واحتواء المتلقى وغرسه  
داخل أبعاد التجربة الفنية الناضجة والتي تحمل مصدقيه القول أن ديوان  
محاولة أخيرة للإحتراف ديوان يفوح عطراً ومنه ما يعبق أحلاماً . يضيء  
ولا يعتم . مسكون بدفء الحب وأوجاع اختراق المدى والإحتراف  
خلف جدران الإنتظار الصماء . وجدرانه منقوشه بالورود والأحلام  
الجميلة والمؤلمة والمستحيلة في آن واحد. إنه « آخر ما قاله التمثال قبل  
التلاشي » حب - صمت - كبرياء - إحتياج أربع قوائم إرتكز عليها  
معمار هذا العمل الفني المتكامل والمكتمل شكلاً ومضموناً أليس  
صرحاً عظيماً هذا الذي يتفجر من ينباع الأربعة؟ فهذه التجربة تقول  
عن نفسها أجمل ما أقول عنها .

ولشريف كل الشكر والتحية والتقدير

فوزي الخطبا





## مقدمة

إن السماء لا تمطر شعراً، لكنها قادرة على تخصيص المشاعر فينا،  
وتحريك الركود في أماننا المألحة .

ولمصادري هذا الديوان الذي أعتبره قصيدة واحدة متعددة  
المشاهد، يعتبر مجازفة وخروجاً صريحاً عن نمطية الكتابة، التي  
أمارسها، وأجيد العزف على أوتارها . لكن إيماني الشديد بالتهجير  
هو الدافع الرئيس لدفع هذه القصائد المتعبة من غياهب الصمت إلى  
شمس الواقع .

لأقول إن المشاعر أغلى ما نملك، وهي سلاحنا الفاضل ضد مادية  
هذا العصر، لكي يتوقف نزيف المعاناة، والانتحار اللانهائي على  
صفحات أوراقى أقدم على موالدةكم بامحبي الشعر وعاشقى الكلمة،  
وأصحاب القلوب الشفافة، والمشاعر السامية محاولتى الأخيرة  
للاختراق .

علنى أحرق في دفاتر وجمي صفحات لونتها بدموع قلبي وأثلاء  
روحي معتمداً على التدفق العاطفي، والصدق الشعوري والانسائية؛  
لأن الشعر حالة والحب أسمى حالات الشعار.  
بجناحي الأخضر أطلق محاولتي الأولية للتحليق في عالم الدهشة  
محاولاً اختراق المدى.

مع حبي وتقديري

شريف شعبان

١٩٩٧/١٠/٢٠

## إهداء

إلى من تحيا بذاكرتي لأموت أنا على هوامش عوالمها المجهولة  
إلى آخر أنبياء الروح حينما تسرى ملامحها في عروقي، لأزداد اشتعالاً  
ثم انطفئ في شتاء قلبي الأخير وموسم الجفاف اللانهائي.  
من وحي عينيها وفيض اشتياقي لها ولدت قصائد هذا الديوان ولادة  
قيصرية من بين فك أقدارنا التي أصبحت أشدّ انتهاكاً لنا.  
إلى أسمى المواطنين حين تموت على قارعة الصمت في زمن قتل في  
داخلنا كل شيء.  
وسيتبقى قلبي نازفاً على أوراق ملامح حبّ يبحث عن وطن لا يقتال  
المشاعر، أو يتاجر بالأحاسيس، وعن نبي لم تضع منه الرسالة.

## سبيلتي

إذا فقد لسانني معجزة البوح، فسوف تحفر كلماتي في ذاكرة الأشياء  
وفوضوية التراجع والانحيار والسقوط بين خيوط عنكبوت الفشل . من  
دماء المشاعر وقدسية المفردات أرسم ملامح حبّ مصلوب على  
جدران الوجع الخرساء؛ لتلون فرشاة دموعي نوافذ المساء القابع خلف  
أبوابك الموصدة يقتله برد الحقيقة وصقيع الوحدة، يحلم في الزمن  
القادم بمن يحمل قلباً حجرياً وقلماً لا تصدأ فيه الأحرف، أو تحترق في  
داخل فرشاته لغة لا تصفها كل معاني الدنيا.

مَنْ أَجَلَكَ كَانَتْ كَلِمَاتِي كَالْفَجْرِ الْمَطْفَأِ  
وَلَكِنِّي سَأُغْنِي لِّلْأَحْجَارِ: لَتَحْتَسِي أَنْفَاسَهَا  
وَعَلَيْكَ سَأُبْكِي عَسَانِي بِالدَّمْعِ يَوْمًا أَنْظَهْرَ  
وَبِكَ سَأَسَافِرُ عِبْرَ مَنَاهَاتِ الْأَحْزَانِ

فَاذْكُرْنِي بِكُلِّ مَا أُوتِيتُ مِنْ كِبَرِيَاءِ  
لَأُنْشِئَ لَكَ أَنْسَاكَ أَبَدًا  
مَهْمَا طَالَتْ الْمَسَافَاتُ بَيْنِي وَبَيْنَكَ  
يَا "سَيْن" الزَّمَنِ الْمَهْزُومِ

بكائيات الحرف سين  
" إليها أينما كانت . ستبقين في عروقي حليماً  
تحطم على صخور الواقع "

هامش

مش راح أوعد

يوم عنيكى

إني أنسى

حبى ليكى

لكن هحاول!؟



### البكائية الأولى

المسافة اللي بين قلبي وقلبك  
مش بعيدة صدقيني  
نفس مسافة اختصاري جوه منك  
واتساع كل حدودك في بـراحـي  
نفس المسافة بين جنون الحلم  
ورماد الحقيقة  
نفس مسافة اهتزاز الكون  
وأوهام التلاشي  
خلف ملكوت ابتسامتك  
واختصار كل الوجود  
لحظة وجودك  
أرجوكي في ساعة وداعك  
اخلعي تحنيط ملامحك  
من مخيئتي اليتيمة  
وارجمي جوايا توهان المشاعر  
جوه سراديب التوتر  
واقطعي شريان توحيد  
دمع ليل الانهيار  
بالمستحيل

وانحصاري في فراغات  
الفشل  
بطوي أيامي الكفيفة  
بعد منك  
ذكري أنفاس الشوارع  
واشتياقها إلا إرادتي  
تستخبي في خطونك  
رعشة ملامح المكان  
التي بيتشكل في لحظة  
اغتناله بوجدانية رقتك  
بعض الحروف الأبجدي  
لحظة حضورك  
بتعود إليها الذاكرة  
بلا تبادل قلوبنا  
يمكن في يوم نقدر نكون  
عكس اتجاه الحلم هينا  
ونقدر ندوب  
كل المستحبات التي هينا  
جوه كاس الهم  
ونكون القدر

## البكائية الثانية

... ( ١ ) ...

اخرجني من ذكرياتي  
لجل أعلن انقسامك  
عن خلايا الوقت  
واسقط في هامش  
ارتعاشات دمعتي  
اخرجني من نبض قلبي  
لجل أعيد تشكيل  
معالم انهيار اللهفة  
و اكسر دواير اشتياقي  
لما يسكني الوجع  
اخرجني من تكوينات الحلم  
لما ينهزم  
على بوابات الرفض  
في دروب التحول  
وتنشوه معالم أمنياتي  
وانتهى على باب مشاعرك



وافطمي القلب الرضيع  
لحظة ميلاده  
وانصهاره في حدودك  
وارتحاله للنهائية

... ( ٢ ) ...

عمري اللي متشرنق  
برعشة المدا  
جوه خرايط الحيرة  
وأشلاء انهزامي  
وانفصالك عن ملامح  
دهشتي  
وخرجك من نتوء  
الآمنيات  
في مدارات التردد  
وبكرة اللي متبعتر  
سماته جوه آيامي  
منسوخة من نفحة ملامحك  
و أنا لسة واقف

على عتبة مشاعرك  
بدور فيكي عن نفسي

... ( ٣ ) ...

علميني إني أنسى  
لحظة التوهان  
في سدره منهاكي  
واشتعالك في عروقي  
علميني إني أفك  
قيود هواكي  
من سيني  
وإني أفتح ثغرة  
جواكي لحبيني  
إني أعصر من مرارة  
جرحي  
مرثية لضياعي



... ( ٤ ) ...

كوني إنتي  
زي ما اخترتي طريقك  
وأنا خلف كونك  
راح أكون  
وقفه حداد  
على قلب تاه وسط الطريق  
وبدمع شوقي وحسرتي  
أنا ح أرسمك  
وإنتي بإيه راح ترسميني

عمان في ٩٧/٤/١٤

\* \* \*

## محاولة اخيرة للاحتراق

” آخر ما قاله التمثال قبل التلاشي “  
مهداة: إلى حلم اللقاء الذي جاء متأخراً ومستحيلاً

هامش :

بسأل عيونك  
ومانيش بحاجة للجواب  
تسمحيلي إني أحبك  
إني أتخبي في قلبك  
من سنيني  
إني أغزل من ملامحك  
صورة معكوسة لزمانني

( ١ )

إنتي وأنا  
خط اصطدام الروح  
بأبعاد الجسد  
طعم انكسارات السنين

في حلق ليل المعصيه  
صرخة جدار الصمت  
في دروب السكوت  
وجع انتظارنا لبكره  
اللى منحنا له ملامحنا  
وبرضه جانا بدون ملامح  
إنتي وأنا  
نشوة خروجنا  
من مساحة ضلنا  
لما ذاكرتي الكفيفة  
تنقبأ ركام الفوضى

( ٢ )

أنا لسه بتسلق  
على أشجار وجودك  
جوه مني  
لجل أنصيد من فضاءات  
اشتعال اللحظة  
في عروق البداية  
نفحة لقا

( ٣ )

إنّني الّلي في عيونك  
بيخضر المدى  
ولما النجوم  
تبلع في ليله ضيها  
باقية ملامحك الضيا  
وإن دبّلت الشمس العتيقه  
ولا طوحها الخريف  
خلف الفضا  
هتكوني إنني شمسنا  
ولو انطفئ في عيوننا  
مصباح الزمن  
ولا انفرط عقد الحياة  
واتسرسبت من بين إيدينا السنين  
ووقفنا على حد التلاشي  
مهزومين  
إنني البداية لعمرنا  
وإن ربنا ملّ الوجود  
أو ملنا  
هتكوني إنني .....

أنا إيه وليه  
 أنا كنت حرف زمان  
 بيتوضا بأوجاع المعاني  
 لجل يكون قديس  
 في دير الكلمة  
 راهب ع الورق  
 ولما أمرته  
 إنه يسجد للآلم  
 مليون رفض  
 وسجدت أنا  
 عصفور عبيط  
 شدة الغنا  
 لحظة دموع  
 من خلف زنزانته  
 اللي كانت من ذهب  
 عصرت قلبي بحسرتي  
 وفتحت له باب القفص  
 بصق في وشي  
 وانزوى في الركن  
 وبكىنا سوا

(٥)

أنا وإنتي في الليل الطويل  
آخر محاولة للوقوف  
على مد جذر الحزن فينا  
لما يقشرنا القلق  
وتعصرنا الساعات

(٦)

أنا وإنتي  
لحظة اغتسال القلب  
من حمى انصهار النبض  
من غبش التجارب  
وانجذابي لحدود  
خط التوازي  
في مدارك  
واتحاد لحظة جنوني  
بالمدى المجهول  
في أشلاء المحاولة الأخيرة  
لاختراقك واحتراقي



( ٧ )

إحنا ...  
كيان الكون  
في كف الريح  
لحظة ما تمضغ  
ذبابات الخوف  
وتمسح عن مشاعرنا  
غبار الانتظار  
ووهم الأزمنة  
وتمنحنا التماسك

عمان في ٣ / ١ / ١٩٩٧

أغنيات ما قبل الوداع الأخير

مهداة إلى من تعرف نَفْسها

ولا يعرفها أحد

هامش :

وبحق من أطلق هواكي

في وريدي

حبي ليكي صدقيني

مش بإيدي وبعدي عنك

برضه ح يكون

مش بإيدي -

عارفه ليه

أصل ضاع

من إيدي إيدي

\* \* \*

(1)

كل السكك بتاخذني ليكي  
كل أحلامي بتتوحد  
مع نطفة وجودك  
جوه مني  
لجل تشهد  
نفحة التكوين  
مخاض الروح  
قيصرية الميلاد  
من عينيك  
وارتجالك في عروقي  
لما تنسج لهفتي الجارفة  
خيوط الرفض لدخولك  
لكن تبلعني أحزاني  
يطل عليه من ليك  
حنين ممزوج مع نبضي  
إللي متشعلق بدقاتك  
ياخذني إلكي توهاني  
ترتل خطوتي اللهفة  
في سكتها لمحراك

وآلاقي نفسي على بابك  
وأبعت وأتلمم  
وأحسر وأكسر  
وأدوب مع رجفة الموقف  
ويعلن قلبي عصيانه  
على وجعي  
على شرخ الأمل فيه  
وأرجعك  
لأنني حقيقي محتاجك

( ٢ )

أخرجني مني لأنني  
ضل شارد  
من شقوق الانهيار  
منفلت من ذكرياتي  
مقسوم ما بين وجع المقارنة  
بين حنيني اللاإرادي  
لاشتعالي  
وبين رماد الانسحاب

اللقاء دأمش لقانا  
والملاح زايغه  
زي سنين حياتي  
والمشاعر فاقدة حتى  
انتمائها لجراحنا  
واحنأ في لحظة تنافر  
وانعكاس المستحيل  
على خط تكويننا الهلامي  
أخرجني مني لأنني  
رماد أمانسي  
العصافير الحزينة  
في موقد النصيب

( ٣ )

اسألني عني الشوارع  
اللي خبيت جوه  
آنات أرصفتها  
آخر ملاح فجر  
شقيش من عيونك  
كبرياء اللحظة  
لما تغسل الليل

المحنط جوه مني  
دمع الخطاوي المجروحين  
واعتصار كل السنين  
نبض طيفك  
لما يسري في عروقي  
حلمي الشريد  
لما بيطارد سنيني  
الهاربة مني  
وانكساراتي  
على مرفأ دموعي  
وانحساري جوه نفسي  
وانهيارى خلف أسوار  
المحاولة المستحيلة

( ٤ )

راح أعيد تشكيل أحلامي  
بحجم حنين العمر اليكي  
وأرسمها قمر إتوضأ  
بطهر عيونك  
واتعلق على شباكك  
ديلان الليل في عيونه

تنطفي أقمار الكون  
بوجودك  
وتثبت رؤية تكوينك  
جوايا  
لجل تنوري كل مسافات  
التخمين  
في حكايا القدر المسلوقة  
وأولى وجهي تجاه قلبك  
لكن ينكرني طريق الشوق  
لمدينة اللهفة المسبية  
وأفضل متكوم ع الهامش

(٥)

سامحيني  
لو مرة لميت السما  
وطبقتهام ومضغتهام  
وخببتهام لحظة خوف  
في جيبك  
وربطت ليلك المشاكس  
في جذوع يأس الأمانى

مع شهقة البوح الأخيرة

( ١ )

سنين عمري ماهش ليه  
وأحلامي ما هش ليه  
ولساني بحاول أستعيد  
نفسي من ورا نفسي  
وأعيد ثاني اكتشاف روحي  
من خلف جزر الحزن  
الممتدة في عينيكي

( ٧ )

مع إني بدخل في غروري  
لما ترسمني العيون  
المشتاقين  
جوه محار الأمنيات  
وتحتويني في مداها  
ساعتها بتشكل جبل  
لكن بنظرة عابره  
من عينك أدوب

عمان في ١٥ / ٦ / ٩٧



**إِلَيْكَ رَغَمَ كُلِّ شَيْءٍ**

لو مرة مات فيه الكلام  
أو كان لساني من خشب  
ح تكوني كلمة ما تنقراش  
ومعنى عمره ما ينكتب  
من نور جـــــــــــــــــبينك  
تستعير نورها الذهب  
من طهــــــــــــــــر قلبك  
كل البنات راح تغــــــــــــــــسل



( ١ )

أيوب عن صبره اعتزل  
ومل استنساخ  
خيوط الذكرى  
من براويز تكوينات اللهفة  
اللي موشومة على كف الإرادة  
وللممة طيف اشتياقي  
من على جدار البكا  
لجل أفك قيود مشاعري  
لحظة صهيل القلب  
لما ينتفض فيه الكلام  
وينطق بالشهادة  
الأولى والثانية لعيونك  
ويقدر بجمع نبض بأسه  
المحنط خلف رجفة عمر  
شاطر كل أحلام المدى  
وجع المحاولة المستحيلة  
لكنه في لحظة هوس  
قدام عيونك انشطر

( ٢ )

من غير كلام  
برشق سيوف الحسرة  
في صدر إشتهائي للتزاج  
ويا أحلامي الهزيلة  
من غير تضرع للحنين  
لجل يتلبسني ثاني  
يمكن أقدر أختصر  
كل الفواصل  
اللي بتتعامد مع خط إلتقاء  
وجعك ووجعي  
خجل الإيدين المهزومين  
لما تتنافر  
ويكسيها جليد  
آخر محاولة للتماسك

( ٣ )

بصرخ بصوت كل السنين  
اليابسة في حلق انتظاري  
واللي بتدخل في حداد الصدفة  
لحظة اغتيالها

تحت أقدام الظروف  
واللي يتراوض همومي  
لحظة انصهار الليل  
وتحيي هشيم الروح  
لما يترسب في قاع  
كينونة الحلم المعاكس  
للوجود  
والمعادل للقلق  
وتنفخ فيه من وهج المرايا  
لجل تعيد تجميعي  
وتشكلني ثاني م العدم  
وأكون محاولة فاشلة  
لمرور الفراغ  
من ثقب دوران  
الأمانى المربوطين  
في أقدام الأميبيا

( ٤ )

وصرخت ليكي  
بصوت زمني المستعار  
لما التهم الصمت

كل حروفي  
وأستعار الخوف لسانني  
وسقطت في شرك  
إضطراب الرؤية  
وما بين جنوني  
إني أكون  
وبين كاف ونون  
شككت أبعاد الصدى  
من ضل صوتي المنهزم  
وصرخت كن  
يا ألف كن  
رغم الوجود  
من خلف بؤرة  
وهم تكوين منحني  
أملّي الضير  
ترتيب هوامش  
مركزية التوحد  
والتقاءنا المستحيل  
منحني تكراري صاعد للنهاية

والنهاية والبداية  
المسافة اللي ما بينهم  
خطوة وحدة  
وقفة أخيرة للتخيل  
من غير رتوش  
لكن في لحظة الخروج  
من بين تراتيل الجنون  
كنت الوجع . كنت التلاشي

(٥)

حبك بيمسح عني  
كل أوساخ الزمان الزئبقي  
وانا لسة واقف  
خلف أسوار جنتك  
اللي بترفضني كل أبوابها  
برجم خيالي  
لما يهرب في حدودي  
برسم على جدران حنيني  
آخر ملامح ليكي

خببتها في إيديه  
لجل أمزجها بضياعي  
لما تسكبني المشاعر  
لكن في لحظة انتشائي  
اتبخرت

( ٦ )

بكرة انطفئ جوانا  
لما انتحر فجره اللقيط  
ووقفنا على خط الوداع  
بنقايض الأحلام بدمعة  
بنقايض الذكرى برعشة  
ونقايض القلب الغبي  
بألف انتحار  
ورهننا للأقدار  
عيوني  
ونبض قلبي  
واللي باقي من ملامحي  
ووقفت بين إيدك  
خيال معكوس

ضل يبحث عن حدوده  
لحظة حداد علي كل شيء  
ومخبي قلبي  
ف كف إيدي  
لجل يدخل من مساماتك  
ويتوسد ويربك  
لحظة ما أصفح  
ربنا المرسوم  
في إيدك

عمان في ٩٧/٦/٢٥



## صرخة الصمت الطويل

مهداة : الى وجعي الأول والأخير

### هامش أول :

لو بكره جة من غير عيونك  
برفــــــــــــــــضــــــــــــــــه  
لو كان بإيدي إني أعيد  
من ثاني ترتيب الزمن  
كنتي ف زمــــــــاني أوله  
لو دق باب القلب غيـرك  
هخفي مـفاتـيحه  
ولاحــــــــــــد ثاني يدخله

### هامش ثاني :

مش هقــــــــــــدر أقــــــــــــولك  
إني بحبك سامــــــــحيني  
يمكن إحساسني بقربك  
أو قلبي يضل طريقه لقلبك

أو إنني ف لحظه ما أوصلك  
تنكسر أحلامي على شطك  
لكنني بقـــــــــــــــــولك  
مش هقدر أقـــــــــــــــــولك

### صرخة الصمت الطويل

عارف بإن طريق  
لقانا مستحيل  
وإن إحناعلى خط  
التوازي مقسومين  
وإن جنون الخطوة  
ليكي شدني  
لجل تستشهد  
سنين الحيرة  
تحت أقدام الندم  
وأحصد رماد اليأس  
وسراب اختصار الوهم  
في جسد المسافة  
المستحيلة لوجودك  
في حياتي

لكنني هتخطي الفواصل  
والحدود لجل أوصلك  
لو حتى أموت  
على عتبة العمر الرخام  
متكفن بنظرة بكره  
المرسومه في عيونك

★ ★ ★

يحاصرني في ركن  
انكساري  
عنكبوت الانتظار  
بغزل خيوط الفوضى  
في صدري  
المعبأ بالدخان  
وأمسح عن قلبي  
غبار كل الوجوه  
المكتوبه قبلك  
واللي دارت  
في دواير اشتعالي  
وانتهت قبل البداية  
لكن بتمسحني في لحظه

أبجدية لهفة  
شدتني لمدارك  
لما دار العمر في دائرة  
وجودي المنطفي  
لجل تكتبني النهاية  
ف سطر ذكرى

★ ★ ★

بعلن بصوت الحزن  
الممتد في عروقي  
لو يوم وقفنا  
عند مفترق الطريق  
وانكسر جوانا  
مجداف اللفا  
يكفيني إني  
أتممت شعائر  
انجدا بي لدنيتك  
وعبدت طيف ربي  
النائم على جبينك  
وسجدت للوجع الطويل  
سجدة خلاص

وضربت أقداري العقيمة  
برجل أشواق المدى  
فتفجرت ينبوع مشاعر  
وارتوى العمر الشراقي  
بالأسف  
واغتسل في القلب  
نبض الانهيار

★ ★ ★

وهزيت جذوع الاشتياق  
لحظة مخاض الوهله  
في قلبي العقيم  
لجل يتساقط عليه  
حلمي المعلق في الفراغ  
وطفت بإيمان اللحظة  
حوالين كعبة الحب  
اللي منقوشة  
في ترائيل رقتك  
لكن جلدني الوقت  
واستعار الصمت  
حنجرتي الورق

وسجنت بوحى  
جوه منى  
علقت انكسارات اللفا  
على فجر ليلي المنهزم  
وجوايا دقت  
كل أجراس المحال  
والنفينا  
بس آه متأخرين

★ ★ ★

ولقيتني بمضغ حسرتي  
ويمضغ ملامحي الوجع  
وشاغت سطور الحيرة  
في كتاب لهفتي  
لكني راح أنوج  
وجودك جوه منى  
وأفايض زمانى  
بكل عمري  
مقابل لحظة  
حسيتك في دمي  
تكسي مشاعري بالدفا

ولحضن قلبك الوسع  
راح أكون صديق  
يفرش دموعه  
لجل تخضر الليالي  
ف خطوتك  
وأبدر حنيني  
ف سكتك  
يمكن في يوم  
تطرح محاولة  
لانتفاضة قلب  
رواض دفتك  
عن نفسها  
فاستعصمت

★ ★ ★

حاول يرفرف  
في سماء الدهشة  
يدخل دنيتك  
ببشدة عذرية  
ملايح طيفك  
لما يمس أطراف

المشاعر  
يترجم مستحيلات  
نظرتك  
برغم سخرية الرياح  
لكنه دار حوالين  
متاهات القلق  
ورجع لحضني بدون جناح  
بدد سنين التوهه  
في دروب الجفاف  
مستني تلمس رعشته  
لحظة دفا  
أطلال لقا  
تجمع قلوب متشرده  
مكتوب عليها تحترق  
لحظة ميلاد الحلم  
من رحم الضباع

★ ★ ★

بنسج ضلوع اللهفة  
في ليلك وسادة  
تضم أحلامك



تترجم انصهار الماضي  
على باب رحمتك  
وتنامي إنتي وتحلمي  
وأنا قلبي يسهر كل عمره  
يبكي منك ولأليكي  
أو عليك  
يرسم علي جدار وحدته  
رقة ملامحك  
نبض طيفك  
طهر العيون لما يتوضا  
بدموعها الملايكة  
أشلاء محاولة أولية  
لوحة الروح الأخيرة  
يكتب رسائله الرافضة  
كل حروفها بعدك تنكتب  
والنايمة فوق جنث المعاني  
لقلبك اللي ضيعنا طريقه  
وضاع في زماني عنوانه

★ ★ ★

قبل ما يطوبنا الرحيل  
ويطوي صفحتنا النصيب  
خليني اتطهر  
من الخوف اللي باع  
لخريف زماني  
فجر ليل الانتظار  
خليني أكحل امنياتي  
اللقطة بلامحك  
خليني بيكي أبتدي  
تجميع رفات  
عمري الحقيقي  
واسمعي صرخة الأشواق  
في بركان  
صمت قلبي اللانهائي  
شقي بصوتك  
الرياني  
أستار الصدى  
لميني من سراديب  
حياتي المظلمة  
ولدرب عمري قربي

كوني ف وجودي  
المبتدا والمنتها

★ ★ ★

افتحيلي باب مشاعرك  
لجل أدخل مرة واحدة  
في عوالم وحنيتك  
وإبني يا هامان  
سلم الرصد الكبير  
لجل أصعد لسمائك  
عند موسى ورب موسى  
وأقرا مراسيم اعترافي  
بين إيديكي  
لجل أكون رب المشاعر  
أصلي شاعر  
إن من غيرك  
مافيش في الكون  
مشاعر

عمان في ١٠ / ٧ / ٩٧

## لقطات سريعة

مهداة الى عيون لا تراني ولكن أراها

يا ليلي قيس  
ما بقاش بقيس  
إلا صهيل النشوة  
في عروق التحدي

★ ★ ★

أنا كل ما أبعد  
عن عيونك  
بتحرق  
وكل ما أقرب  
من عيونك  
بتحرق  
لو كان غرامي  
من ورق  
أنا من رماده  
ح أنبعث

★ ★ ★

أنا لو زمانني  
ضلني  
بكفيني شوقي  
هزني  
ولو عيونك صرحت  
بالرفض ليه حقولهم  
بكفي حنيني شدني

★ ★ ★

لما بشوفك  
بيكي قلبي م الفرح  
ومن فرحتي أنا بنجرح  
ويمر يوم من غير  
ما تمنحني ملامحك  
نفحة وجود  
ألا فيني من شوقي  
أنجرح  
وتيجي ف منامي  
أنجرح  
يا هلترا

لو مر طيفي  
في خيالك  
راح ينجرح

★ ★ ★

أنا كل ما أسأل  
روحي آخره حبي إليه  
يجاوبني قلبي  
والدموع تكوي عينيه  
يكفيني إنه  
عاد لي نبضي  
وإنني عايش بيه وليه

★ ★ ★

بتعرفي لو مرة  
قلبك حسني  
يومها ح أكون  
رب البشر  
وتدب الروح  
في الحجر

★ ★ ★

أنا كل ما أقرا  
أشعاري عليك  
بحس إنني  
بقيت نبي  
وإنك رسالتي  
للوجود  
وعينكي أكبر معجزة

★ ★ ★

بتعرفني  
لو مرة إبليس  
حس بيكي  
كان تاب  
وإتحول ولي  
وإن شاف عيونك  
كان سجد

★ ★ ★

عارفه إحنا ليه  
دائماً بيبعد نا القدر  
عن بعضنا  
لأننا

لو يوم توحدنا  
ح يتلاشي الوجود  
وأشواقنا  
راح تطرح شجر

★ ★ ★

لو مت إبكيني  
لأنني  
عشت عمري  
أبكيني  
وإن موتني إنتي  
مش راح أبكي  
يوم عليك  
عارف ليه  
لأنني سلفتك  
دموعي كلها  
ونسيتي ليه  
ترجعهم

★ ★ ★

حببت كتير  
وقلبي إتحب كتير



ولكنني لما دق حبك  
باب مشاعري  
رجعت من ثاني  
صغير  
بحبو على سكة غرامك  
وحدني  
في الدرب الطويل

★ ★ ★

من يوم ما شفت  
عينيك  
ما بقيتش أشوف  
غيرهم عيون  
يا هلنرا  
من سحر عينك  
انخلق كل البشر  
ولا عيونك  
للوجود هما القدر

★ ★ ★

لما قابلتك  
قلبي م الاشواق سجد

وهربت منك ليكي  
لكن  
دخلت محراب وحدتي  
وقفلت كل بيان  
سنيني  
وأخذت م الدنيا  
أجازة  
لجل أبكيكي  
وأبكي الظروف

★ ★ ★

تعرفني الفرق إيه  
بينك وبين  
كل البشر  
الفرق إنني  
لما بشوفك  
بنسى الجميع  
وكأنك إنتي وبس  
كل البشر

★ ★ ★

لو قولتلك  
أنا يوم بحبك  
ما تضحكيش  
وإن قولتلك  
مقدرشي إني  
استغني عنك  
ما تستغريش  
وإن يوم رحلت  
بدون وداعك  
ما تلومينيش  
لأن في كل السكك  
خطاونا أبدأ  
ما بتلتقيش

★ ★ ★

سألت كل الخلق  
عنك  
قالوا إنك  
وهم عايش في خيالي  
لكني لما سألت  
نبض القلب عنك

فالي جوايا مسافرة  
بس أنا  
معرفش مالي  
كل ما أحاول أطولها  
ألقي بينا  
سور وعالي

★ ★ ★

بأسف عليك  
بأسف عليه  
بأسف على الناس كلها  
لو يوم لاموني  
في هواكي  
انا حبي ليكي  
لو في يوم  
وزعته  
على كل الوجود  
كانوا قاسموني  
ف غرامي

★ ★ ★

تعرفني  
الفرق ايه  
بينك وبين ربنا  
الفرق  
بعبد ربنا  
علشان أخش جنته  
لكني لما بعبدك  
بخش نار حبك  
وبالحسرة أصطلى

★ ★ ★

تعرفني الفرق  
بين وجهك  
وبين وجه السما  
الفرق إن السما  
مستعيرة نورها  
من كل النجوم  
لكنه وجهك  
نوره من دمع  
الحيارى المشتاقين

★ ★ ★

تعرفني الفرق ايه  
بينك وبين  
كل اللي دخلوا قلبي  
قبلك  
الفرق إنه كلهم سجدوا  
لقلبي  
وانتهوا  
لكنك إنتي  
لبكي أنا قلبي  
سجد  
لجل معاكلي بيتدي

★ ★ ★

لو دق غيري  
باب مشاعرك  
وانبعث حبه  
في قلبك  
مش ح ألومك  
ولا ألوم قلبي  
اللي حبك  
إنما ح أسأل عيونك

قيسي ما بين حبه  
وحبي وصدقيني  
عمر ما في الكون  
ح تلقى  
حد حبك عمره قدي

★ ★ ★

عمر ما حسيت بضعفي  
غير وأنا قدام  
عينكي  
ولا قلبي كان جبان  
إلا في لحظة دموعه  
بين إيديكي  
ولا ناه مني الكلام  
غير معاكي  
إنني إبه  
وليه دخلتي في حياتي  
صدقيني  
إحترت فيكي

★ ★ ★

قالوا عني إن قلبي  
زي موج البحر جارح  
واللي جاي  
اكثر كتير من اللي رايح  
جيتي إنتي  
واختصرتي كل عمري  
ف لحظة واحدة  
وبطوفان الحب  
غرقتي سنيني  
وجوه بحرك قلبي نابه

★ ★ ★

لما تضحك يوم حبيبتي  
تشرق الشمس ف عيوني  
ألف مرة  
والسما تسجد في كفي  
وألقي قلبي بصلي ليها  
ألف ركعة



★ ★ ★

وأما تبكي يوم حبيبتي  
تبلع الأرض جبالها  
وجهنم تنطفئ  
م الرهبة نارها  
والسما تطرد نجومها  
والطيور تعلن حدادها  
وأنا قلبي  
ينصلب  
على باب عيونها

★ ★ ★

لو ما كناش إلتقيننا  
يا ترى كان يجري إيه  
يا ترى كان قلبي نفسه  
هو ه قلبي  
يا ترى كان عمري برضه  
هو ه عمري  
ولا إيه

يجاوبني شيء  
جوايا أكبر م الكلام  
هوه إنته من غير حبه  
راح تسوى إيه

★ ★ ★

لما حد يجيب لي سيرتك  
قلبي بيكي  
لما يسأل ليلي عنك  
عن ملامحك ولا اسمك  
ولا يترجاني أصارحك  
برضه أبكي  
ومش هقول  
ولا حاجة  
عنك  
إلا إني  
مش بحبك  
إنما مليون بحبك

★ ★ ★

بسألوني ف يوم صحابي  
حاسة بـيك  
عارفه إنك  
قلبك إتجن بهواها  
أسكت ويهرب الكلام  
ويزيدوا هما في الملام  
ويضحكوا لما دموع الحيرة  
تحرق لي خدودي  
أصرخ وأقول  
ما يهمني  
تعرف ما تعرف  
مش راح يفيد  
لكن الأكيد  
مليون أكيد  
إن مت وف قلبي  
هواها  
ح أموت شهيد

★ ★ ★

يترجى فيه القلب  
بعد الحيرة إني  
عنها أرحل  
أو عن هواها ف يوم أتوب  
ما هو قلبي خائف  
إن من كثر الهوى  
لا ف يوم يدوب  
ما هو إنته يا قلبي  
السبب  
وأنا لو طاوعتك  
وبعدنا  
راح تعمل إيه في الذكريات  
ما هو برضه من نار إشتياقك  
راح تدوب

★ ★ ★

تصوري إني بغير  
من فلمي دائماً  
لما يكتب شعر فيكي  
وإن جيت ألومه

يقولي أسكت  
كل شعري منها ليها  
وأنا لما أبكي على أوراقها  
يحيي ربي اللي نايم  
في عينيها

★ ★ ★

معرفش ليه  
أنا كل ما أبعد  
قلبي يزداد قرب منك  
وكل ما أقرب  
ألقي شيء ببعدني عنك  
يا هلتر البعد ولا القرب  
اللي ح يوحد طريقنا

★ ★ ★

لو كنت ف حبك  
أنا مجنون  
هتكوني العقل  
اللي بيتحدى كيان الكون

وأن كنت أنا أعقل  
ما في الخلق  
هتكوني جنوني  
وأسمى آيات  
الكاف والنون

★ ★ ★

اخترت أكون  
واخترتي تكوني  
واختارت لنا  
الدنيا نكون  
لا طريقي يوصل لطريقك  
ولا يوم خطاويننا هتوحد  
ولا مرة إيدنا هتتماسك  
لكن احساسني بوجودك  
جوايا بيكبر ويفرع  
أحلام ما قدرنا نكملها  
يمكن في الزمن القادم  
أيامنا تقدر تزرعها

### الخاتمة :

مضطر أعلن انسحابي  
من حياتك  
من غير اقولك  
ولا ألمح لعيونك  
عن حبي ليكي  
الي أكبر من حدود  
كل المعاني والحروف  
هتكوني وجعي وذكرياتي  
وح أكون أنا علامه استفهام  
بتكتبها الظروف  
إن حسيتيني يكفي  
دمعة واحدة منك  
تحبي في عروقي سنيني  
وكلمة تسكن ذكرياتك  
قولني كان  
بس كوني أختفي  
لجل تكوني  
حلم صغته من جنوني

عمان ٩٧/٧/٢٠

## آيات من كتاب الحب

مهداة : الى سين التي تسكنني

هامش :

على قد ما حبك عذبي  
على قد ما كنت أنا محتاجه  
حسيت بوجودي أما عشقتك  
وحايسوى الكون إيه من بعدك  
لكن وحياة حبك عندي  
يكفيني فخر إني هويتك

صورة :

وبدوب كل الكون في عنيكي  
وبدوب عمري ف فنجانك  
وأنييم ليلى السهران  
علشان أسهر لك مع دمعي  
وبسافر جوه حدود التوهة  
علشان أنساكي  
بلاقيكي مسافرة جواية



### صرخة :

أرجو كي منك حـريري  
حـريري فـيـه  
انقـيـادي لعنـيـكي  
وارتـحـالي تمـلي فـيـكي  
وارتـعـاش كل الحـروف  
لحظة ما أشـوفك

### مرآة :

بنسى كل الكون في ثانية  
ولا بنسى لحظة حبك  
اللي نابض في كياني  
واللي مهما منه أعاني  
أترجى فيه يعذبني ثاني

### لحظة :

دويت قـالـبي  
جـوـه كـسـاسك  
لجل يهـمـسـلك بحـبي  
أو يموت على قبر صمتي

والتقينه رجعلي باكي  
وقال سامحني  
خفت نجرحني الحقيقة  
سبييني ضايح  
بين رماد وهمي وسكاتي

#### امنية :

لو كنت بقدر  
أسكنك  
كان حبينا  
لن يكون قلوب  
كل البشر  
وكان رينا  
غمار مننا

#### وصية :

لوقفك  
إني حتما  
ح أنسى حبك  
زي ما نسيت

اللي قـــــــبلك  
اضحكى من كل قلبك  
وأســــألهم  
هما فيهم حد زيك

#### تتابع :

من يوم ما عرفتك  
وأنا بسأل قلبي وعينيه  
انخلقت أنا ليكي ولا  
انخلقتي إنتي ليه  
هيه صدفه جمعتنا  
ولا حلم وخايف إني  
منه أصــــحى  
إن كــــان دا حلم  
يبقى ح أعيش العمر  
ومغمض عينييه

عمان في ٢٠ / ٨ / ١٩٩٧

## من وحي عينيها

كلما رأيتك كتبت قصيدة وإذا لم أرك، تكتبني القصائد  
سيدتي سَابَقِي حاضراً في الماضي وَغَائِباً في الحاضر

### هامش

من وحي عينيها  
أنا ح أكتب ليها  
قصائد حب  
تنور بالنشوق  
لياليها  
وح أقدم قلبي  
قربان ليها  
وح أضحي بأحلامي  
عشائنها  
وأبكيها  
يمكن دمع الحسرة  
ف يـوم  
يزرعني بسمه ف أيامها



(١)

من قبل البدء  
وقبل الكاف الأولى  
في التكوين  
ولغاية لفظ  
أنفاس النون  
وأنا عاشقك  
بس القلب حزين

(٢)

من قبل ما رب الخلق  
ينفخ في الصور  
ويصحب الروح  
في قوايز  
التكوين الأول  
ويشكل المادة فراغ  
لوجود العدم  
المزروع فينا

لجل ما يستوي ع العرش  
أنا كنت الست أيام  
الـداخـلة فـ  
أصل  
الأشياء  
لكن مستاء  
من طول الخطوة ما بينا

(٣)

من قبل خطيئة آدم  
وحدود عبثية أقداره  
والجنة الراجمة وجوده  
في أرجاء اللحظة المنفية  
أنا كنت بحاول  
إنني أبدل ليل البعد  
بألف نهـار  
لجل ما تتوحد أقدارنا



(٤)

من قبل ما حوا النايمة  
في عطر الشـهـوة  
تخرج من ضلع القلب  
النازف أو جـاءه  
وتقسم تفاحة الملكوت  
على نبض الليل  
في عيون بتقامر  
بالـلاهـوت  
أنا كنت بحاول أدخلك  
من ثقب الحلم  
الرافض يجـمـعنا

(٥)

أنا لما دخلت عينيكي أنام  
وأهرب في مداكي من الأيام  
معرفتـش يومها إن كنت  
قابيل أو حتى هابيل  
لكن اللي أنا متأكد منه  
إنـي لا يمكن أبداً هـقـبـل  
عنك إنتي أي بديل

**أقول وداعاً....!؟**

## ہامش اول:

حببتك من غير ما أقولك  
وراح أبعد من غير ما أقولك  
لكن أنا ليه رجاء عندك  
أرجو كي ابتسمي ف وداعنا  
خليني أحس ولو مرة  
إني مريت يوم في خيالك  
أو كلمة ف دفتر أحلامك  
وبكرة الأيام راح تثبتك  
إن بعادي كان عشتانك

## هامش ثانی:

أنا بعلن فشلي قدامك  
وبلون بالدمع ملامحك  
وبقـــولك



أيوه أنا مش قـدك  
راح أكفن قلبي بأحلامك  
وح أكفن جوايا حكايتك  
علشان أيامنا بترفضنا  
وأنا ح أفضل عاجز  
أوصالك

★ ★ ★



أيامك في الوقت الضائع  
أحلامك في الوقت الضائع  
ونهار ما الحب لمس قلبك  
كان برضه في الوقت الضائع  
وح تفضل في الوقت الضائع  
ماليون ضائع

(٢)

مع إنك خـارج  
عن نص الكون  
وبتـرفض دايما  
إن تـكون  
نسـخة كـريون  
من أيامك  
وبتـصدق على بأس  
الدنيا بـاليك  
ولا بتـصدق  
إن الأحلام مش من حـقك  
وسنين العمر ما هـش ليـك  
وأنتـاريـك

ولا عـمـره يـأثـر فـيـك  
إن إنـتـهـه تـكـون  
مـجـنـون عـاقل  
عـاقل مـجـنـون  
جـواك بـتـرسم الكون  
لـجـل ما تـمـسـح لـحـظـة تـوهـان  
مـعـانـيـك  
وـلـاحـد بـيـرسم أوجـاعـك  
لـمـا إـبـديـن الـيـأس تـحـاول  
إنـهـا تـمـحـيك  
ولا عـيـاد بـعـنـيـك  
غـيـر أحـزانـك  
بـتـدوب فـيـك  
ولا تـدوب فـيـك  
فـي كـلـا الحـالـتـين  
مـا هـي مـنـك لـيـك

★ ★ ★

(٣)

يا حبيبة إمبراح  
ويا وجع الذكرى  
ف بـ كـ رة  
وديتي ملامحك  
فـ ين الـ يوم  
متعود أصحى وأنام  
على طلة طيفك  
لما يتـ شكل  
ع الجدران الباردة  
زي خيوط الحلم الباهته  
لجل يطهر قلبي آخر الليل  
والصبح يطهر لي عيوني  
ويرجع ليـ آخر شهقه  
ولت هاربة م الرئتين  
وأنا وإنـني إتـنين  
لكن بـنـكون  
مجموع واحد  
دائما متقسم على عشرين  
أصل احـنا

ف قوانين القسمة  
أحزان وجراح  
وقلوبنا الدبلانة تملي  
في دوامة المكتوب  
ضايعين

(٤)

ح تخالف على إيه  
وتخالف من إيه  
وح تفترق إيه  
بين بكرة وبين إمبارح  
عائش علشان إنك تحلم  
ولا بتحلم علشان تعيش  
ما هو في الحاليتين  
بتلاقى مفضيش  
والفترق ما بين  
أصل وجودك  
وما بين ضلك ع الحياة  
إن إنته عبيط  
ضلك بيخش ف أبعادك

ويتابع دايما تكوينك  
لكن إنته بتـهـرب  
من ضالك  
مع إنه ساءات  
بتـدارى فـيك

( ٥ )

مكسورة ملامحك  
ف مـرايتك  
مع إنك بتشوف فيها  
كل الكون  
إلا إنتـه

( ٦ )

لساك بتقايص بالمنطق  
علي منطق يمكن يفـراك  
ويتزرع في الزمن المالح  
أشعار عاقر  
لحنين عاقر  
ويتوهب قلبك في الزحمة

لقلوب عــــــــــــــــافــــــــــــــــر  
والحب ف أيامك فــــــــوضي  
بتحب عشان عمرك تبكي  
وبتبكي عشان حبك يكبر  
وف عــــــــــــــــز بكاك  
وجنون حــــــــــــــــبك  
لمرافقء سهدك بتهاجر  
مع إنك مؤمن بالصدفة  
لكن بالاقدار كافــــــــر

( ٧ )

مع إنني بــــــــــــــــاف  
بطويننا الوقت  
بجرحني الصمت  
لكن دلوقت  
مش فــــــــــــــــارقه  
كــــــــــــــــتــــــــــــــــير  
إن كنت ســــــــــــــــكت  
ولا اــــــــــــــــكــــــــــــــــامت  
بكفي إنني هويت



لكنني هويت  
رغم اني حـاولت  
أتحدى الوقت

( ٨ )

خاتمة :

يا حبيبتي مرغم أنساكي  
رغم إنك في عينكي ملامحي  
وتملي ف وحدتي بقراكي  
واشتاق لوجودك وبأيا  
واتمنى عيونك تقراني  
واتشكل مع كل قصيدة  
انخلقت من وحي عينيك  
وبكفن بعدك كلماتي  
إللي حتبكي وتبكي

عمان في ١٩٩٧/٩/٧

## إعتذار

مهداة : إلى الفصل الأخير في ملبودراما القلب الممزق. ليكن وداعنا مشرفاً كما كان حيي صامتاً. خلقنا متوازيين. سنفترق ونحن ايضاً متوازيين..!!

## هامش :

بعذر  
عن كل لحظة شوق في قلبي  
عشتها لك  
عن كل كلمة حب  
يوم كتبها لك  
عن كل دمة يأس  
سالت فوق حدودي  
وبعذابي بعثها لك  
عن كل نبضة إحتياج  
تجري في عروقي  
وجوه مني شيلتها لك  
وبدق أجراس الرحيل  
وأعلن في ليلي اغتيالك

لكنني لازم أعتترفلك  
إنني بحبك حب  
عمره ما مرف خيالك  
ولا حتى جه أبداً في بالك  
لكنني لا زم أنطفي  
لجل ما تنور آمالك

( ١ )

برجم خيالي جوه منك  
وأرجم جنون القلب  
في بركان سكوتي  
لما دارت أمنياني  
عكس شرع المستحيل  
في وريد شوقي الهلامي  
لما أعلنت إنني كافر  
بالأمني . بالليالي  
وإنني مؤمن بوجودك  
في دفاتر إشتياقي  
لكنني بطلق صرختي  
لازم يا أحلامي تموتي

لازم يا أيامي تضيعي  
وانتي يا ربه جنوني  
إن فضلتني جوة قلبي  
يبقى قلبي حلال عليك  
ح اشتريلي قلب ثاني  
بس ح يكون من رخام

(٢)

كنت محتاج إنني أحبك  
إنني أصلي خلف قلبك  
حتى إن كانت صلاتي  
ألف باطله  
لأنك صك غفراني  
وهدايتي  
بس لازم إنني أضيع  
وإنني أفطم ألف مرة  
قلب طول عمره رضيع  
شابت الأحلام في نبضه  
وفاكر إنه  
مهدى للزمن الوضيع

(٣)

في مزاد الوقت  
راح أبيع حبي ليكي  
وأوهب الذكرى  
ملامحك وملامحي  
وأكفن ذكرياتنا  
بالندم  
وانتهى على سطر  
نسيان إنحفر  
جوه حدود المستحيل  
وأعمد قلبك الطاهر  
بأنفاس الوجع  
وألون كف أقداري  
العنيدة  
بانهزامي وانكساري  
على جدار البكا  
وتطوى أيامنا المسافه  
وتجف أشجار اللقا

( ٤ )

إن هزني شوقي إليكي  
هنده عليك  
من خلف أسوار وحدتي  
ويكون حنيني كعبتي  
ويعتمر قلبي بجنون لهفتي  
وتأذن الأحرار في نبضي  
بالحجيج لدنيتك  
وتيجي أشواقي لمداكي  
هرولا  
من كل فج عميق  
لكن حيطويني الزحام  
واللهفة بغتالها  
الضجيج

( ٥ )

بعلن خيانتني لمشاعري  
وبحاكم الأقدار  
وبشنق بكره فيكي  
وأفتح حوار ساخن

ما بين وجعك ووجعي  
يا هلترأ أنا خنت قلبي  
لما هزيت جذع ليلك  
ولا خاني قلبي لما  
دأب على خط التلاشي  
في مستحبك  
ولا خانتنا الظروف  
لما التقينا  
متغربين عن كل شيء  
متشوهة فينا المشاعر  
دببت اللفظة ف عينينا



## المشهد الأخير

مهداة: إلى أغرب لحظتين في حياتي  
لحظة أن اجتاحتني حبك، ولحظة أن حطمني وداعك.

### هامش أول :

يا حبيبتي  
مع إنني حزين  
لكن لهواكي راح أغني  
وأفتش عني فيكي  
وأفتش فيكي عني  
وأسأل أحزانك جوايا  
اليوم راح نطوي قصتنا  
م الأول لبه كنا بدينا

### هامش ثاني

مهما يحصل من  
لازم نغزيني  
وإن كفرت بكل شيء  
إنتي ربي وإنتي ديني







وأحلامي صابها العطب  
ملعون يا قلبي الغبي  
دائماً بتبكي لغيري  
جريت تبكي عليه

★ ★ ★

(٣)

كان حب اكبر  
من مسافة لهفتي  
كان حلم رافض دنيتي  
كان لحظة واحدة  
لانتحار كل العواطف  
في دفاتر وحدتي

★ ★ ★

(٤)

أعذريني  
لو مرة أسقطت ملامحك  
من سنينني

لو شمس أحلامي إنطفت  
وسجنت جوايا حنيني  
وكفرت بصلاتي لعيونك  
ورجمت طيفك جوه مني  
وكسرت قيد حبي وجنوني  
ومنحت للنسيان  
قصايد حبي ليكي  
اللي سقيتها من دموع  
قلمي وملامحي  
لكن أنا عايزك تكوني  
سيف التحدى  
في وش أقدارنا الغريبة  
وجع القصيدة اللي بتحفر  
في قلوبنا المستحيل  
وأنا حنسحب من ذكريات الليل  
وأحلام المدي  
ما هو مستحيل  
إن ربيع قلبك ف يوم  
بحضن خريفي

★ ★ ★

(٥)

مكتوب علينا ننتهي وسط  
الطريق  
ونسدل ستاير الذكرى  
على حب أبداً  
في الزمن ده ما لوش مكان  
بس اللي لازم تعرفيه  
إني ما خنتش حبي ليكي  
لكن اللي خانتني سنيني  
وبقت الحكاية م النهاية  
لبداية  
مسرحة  
واحنا كنا فصل فيها  
بس مش كل الفصول  
واحنا النهارة

على خط الأسف واقفين  
مكسورة في قلوبنا الحقيقة  
مسلوبة منا كل ملامح  
ذكرياتنا  
ونخط بدموعنا النهاية  
ونسبنا نسأل نفسنا  
هوه إحنا كنا إبتدينا  
لجل النهارده ننتهي  
ولا إحنا كنا التقينا  
لجل النهارده نفترق



## الشاعر في سطور

- مواليد ٢٢/١٠/١٩٦٨م محافظة البحيرة / مصر.
- خريج المعهد الفني التجاري / شعبة محاسبة.
- حاصل على المركز الأول على مستوى الجمهورية - ولقب أحسن شاعر غنائي عام ٩٣ عن أغاني مسرحية ست الحسن من الهيئة العامة لقصور الثقافة، شارك في العديد من المهرجانات والأمسيات الشعرية.
- نشرت أعماله في العديد من الجرائد والمجلات المحلية والعربية عضو - مؤسس في جمعية الأدباء بدمهور.
- تناول قصائده العديد من النقاد في مصر والأردن، ففي مجلة الشراع في العدد الثامن كتب الناقد المصري رضا امام عن قصيدة رتوش تحت عنوان «قراءة في رتوش شريف شعبان»
- وفي جريدة الرأي تناول الناقد الاردني / فوزي الخطبا ديوانه تكوينات تناولاً نقدياً في العدد الصادر بتاريخ ٩٧/٩/١٢.
- استضافته الإذاعة الأردنية عدة مرات في برامجها الثقافية.
- حاصل على برقية شكر من جلالة الملك الحسين المعظم.
- كتب الأغنية الكاسين للعديد من المطربين الشباب العرب.
- كتب أغاني الألبوم الأول للمطرب المصري / أحمد فليفل والذي بعنوان «يا أم العيون السود» ألحان د. طارق مرير .
- كتب العديد من المقالات الأدبية والنقدية.

ب عنوان «يا أم العيون السود» ألحان د. طارق مريز .  
- كتب العديد من المقالات الأدبية والنقدية.

#### من أعماله :

- ١- ديوان شعر بالعامية بعنوان «تكوينات» تحت الطبع في مصر في الهيئة العامة لقصور الثقافة ضمن سلسلة «ابداعات».
- ٢- «عزف على أوتار الوجد» ديوان شعر بالعامية مخطوط.
- ٣- «لوحات ارتجالية من وحي الفوضى» مخطوط بالفصحى.
- ٤- «أذكريني» مخطوط بالفصحى.
- مؤسس لأسرة أدباء المستقبل لإحتضان الأدباء الواعدين.
- مؤسس لرابطة الاصدقاء الأدبية للمراسلات الدولية.



## فهرس

رقم الصفحة	المحتويات
١	تقديم
١٢	مقدمة
١٣	إهداء
١٥	بكائيات الحرف سين
٢٢	محاولة أخيرة للاحتراق
٢٨	أغنيات ما قبل الوداع الأخير
٣٥	السقوط من شرفة المدى
٤٣	صرخة الصمت الطويل
٥٤	لقطات سريعة
٧٤	آيات من كتاب الحب
٨٧	من وحي عينيها
٨٢	لافتات على قارعة الصمت
٩٢	إعتذار
٩٨	المشهد الأخير
١٠٥	الشاعر في سطور

